

四庫全書

集部

欽定四庫全書

集部

曝書亭集卷七十一至三

一 詳校官庶吉士臣汪彥博

助教臣常循覆勘

總校官降調編修臣倉聖脉

校對官修撰臣吳錫齡

謄錄監生臣費思書

欽定四庫全書

曝書亭集卷七十一

翰林院檢討朱彝尊撰

碑

禮部尚書兼掌翰林院學士長洲韓公墓碑

禮部尚書兼掌翰林院學士長洲韓公康熙四十有三年秋八月以疾卒于官明年柩歸依大學士宋文恪公例入城中故第發喪既卒哭公子孝嗣孝基御李直經

金匱要略卷之十一
造門稽顙言曰先公之葬不敢後期茲考宅有日矣謹
以墓碑為請彝尊交公于未第之前逮通籍為公後進
辱知最深撰碑不敢辭公諱葵字元少別字慕廬先世
自鳳陽遷于吳明太醫院吏目曰逢隆者公曾祖考也
萬歷丙午鄉貢進士歷知雲和黃巖二縣事贈資政大
夫

經筵講官禮部尚書曰治者公祖考也長洲儒學生贈
資政大夫

經筵講官禮部尚書曰飭者公考也妣曰周安人公以康熙十一年由國子監生中順天鄉試明年會試

殿試皆第一授翰林院修撰纂修孝經衍義旋充

日講官知

起居注主乙卯順天鄉試歷右春坊右贊善進翰林院侍講乞歸改葬其親事畢補原官轉侍讀升翰林院侍講學士仍充

日講官知

起居注未踰月補內閣學士兼禮部侍郎二十六年以疾給假里居八載點勘六經凡漢儒箋故唐儒義疏宋儒章句靡不采獲而裁其中於史稱司馬遷班固陳壽文宗臨海朱右所集唐宋六家詩尚唐音然不喜作臺閣之體時崑山徐尚書乾學解任出都領書局於洞庭山公誼敦師友無有山水之好恒往助其討論排纂又於六十坊選閒房得漁村將著書以老矣天子忽召公有司敦促就道乃行既至入見

乾清門

上慰勞再三

命充纂修一統志總裁官時康熙三十有三年也明年
仍補內閣學士兼禮部侍郎越三年春充

殿試讀卷官是秋以禮部右侍郎兼翰林院學士尋奉
命掌翰林院學士印務充

日講官知

起居注三十八年冬調吏部右侍郎仍掌翰林院學士

事明年奉

旨教習庶吉士夏充

經筵講官冬升禮部尚書仍兼掌翰林院學士事教習如故既而公以院務殷繁請解尚書任

上不許下

優旨答公會公以病劇再疏乞身

天子終莫之許也公嘗語門弟子張大受曰吾貴為尚書何如秀水朱十以七品官歸田飯蔬飲水多讀書萬

卷鳴呼公之胸懷蕭然自遠若此蓋公始終以文學上
結

主知

天子語稠疊有云韓蒧天下才風度好奏對亦誠實又
云韓蒧學問優長文章古雅前代所僅有也又云韓蒧
所為文能道朕意中事故凡應奉文字每進一篇輒稱
善館閣多所撰述公必與焉若平定朔漢方略政治典
訓律例各局皆充總裁官

經筵日講

上倚公侍左右敷陳治理公精白一心便宜獻替動

天聰者多矣而公厚重不泄未嘗自矜合乎古大臣善

則歸君之義

萬幾清暇

錫予便蕃莫能殫記

御書篤志經學潤色鴻業扁額懸於堂洵稽古之至榮

矣公在講幄久

朝廷大政事或未與廷議然平生持論侃侃不阿勿為
兩可之說如海關不當設關稅不當添私錢禁不當過
嚴永定河工事例不當許捐道府會試所重掄才業分
南北中卷不當復分左右監察御史鄭惟孜以國子監
生多江浙人有冒籍赴試者上言請盡發回原籍肄業
公曰太學之設三代共之漢東京視學生徒園橋門觀
聽者以萬計宋立三舍之法明初擢用人才多由此途
出京師首善之地遠人嚮化方且聞風慕義來學若因

一二不肖之徒輒更定制悉為驅除勢必太學一空有失國體惟攷言非是事得寢公所著有懷堂文集二十二卷詩彙六卷其舉子業以古文為今文竒而有法其初未遇鄉之先達或大怪之徐尚書閱其闡卷擊節歎賞登于榜及取上第傳誦

朝野十室之邑三家之村經生塾師無不奉為圭臬然公之不朽終當以古文辭孝經衍義傳也公生於明崇禎十年七月享年六十有八夫人李氏明太常寺卿掌

國子監事贈禮部右侍郎崑山魏恭簡公校之從孫公
本姓李夫人國子生玉滋女也子七人孝嗣康熙己卯
舉人孝基庚辰進士改庶吉士御李歲貢生孝潔孝容
孝鼎孝餘女子三人一嫁歲貢生金宣忠一許字宋公
子訥一未字孫男九人女十一人曾孫男一人女二人
系之詩曰公先從祖厥諱世能曳履容臺文獻足徵公
復其始於焉代興

天子求賢臨軒策問公慮三藩過唐方鎮知幾先見匪

啟其譽

帝曰汝莢乃沃朕心句臚首唱高譙瓊林當其始進受
知已深乍入玉堂旋司

記注載筆螭坳息陰溫樹

帝曰汝莢洵美風度先聖有訓行在孝經孰為衍義著
作之庭公以一手羣言是并公知

制誥達情通理如彼梭腸絲抽不已如彼舟船操之下
水公之進講不怵不驚融經會史專獵其精若鐘在懸

大鳴小鳴維宋思陵父讎未雪公之持論戰不可決辭
和且平

帝心嘉悅公之扈

蹕或疾或徐既抵里第仍俟周廬見賢不蔽見利不趨
帝有恩言汝遷少宰公方簡要作士模楷兼領詞垣彌
有華采

帝有恩言汝作秩宗可帥其屬佐建保邦神人上下罔
不和同勵相國家其惟吉士

命專教習課誦文字樂育英才菁莪中泚人第知進公
退是求遺榮辭祿

至尊惻留萬鍾非願終戀一丘公也魄動乃寢乃夢神
曰止止時秋屆仲淹數之度寤言先洞青門罷餞素車
奈何芝旁就焚蕙歎則那老成凋謝泣下者多公之諸
子發喪故宅絮酒生芻賙方遣策靡不中禮觀者咸戚
厥既得卜井楫起墳丸丸貞木樹之墓門僉曰吉壤毋
有後難我作斯銘昭諸美道其實不誣其言非譎他時

琬琰庶幾有考

光祿大夫兵部左侍郎楊公神道碑銘

公諱雍建字自西一字以齋姓楊氏杭州海寧人補嘉興府學生貢入國子監順治甲午舉順天鄉試明年乙未會試中式

賜同進士出身除知高要縣事充廣東丁酉鄉試同考官擢授兵科給事中轉禮科右給事中充己亥會試同考官再轉吏科左給事中進刑科都給事中以疾去尋起原

金匱要略卷之十一
官內升以京卿需次田里復

召入省食四品俸管戶科給事中轉禮科掌印給事中
遷兵部督捕右理事官晉右通政使轉左歷太僕寺卿
擢都察院左副都御史充乙未會試總裁奉

詔巡撫貴州

覃恩封光祿大夫都察院右副都御史加三級入為兵
部左侍郎以母年高上章乞終養

報可歸侍奉者四載既免喪分

命修理高堰以勞成疾引還此公立

朝持節在野之進退本末也高要當廣右之衝制府駐
節於是師行絡繹供億甚煩羽書一至徵民夫累百動
遭鞭笞夫遇點冊逃避吏胥繫之若牽羊犬納諸解字
隙地凍餒者多公下車未久歲除飲椒酒起曰民夫亦
人子何忍使之露宿命徙廊廡下兼徹酒饌給之夫泥首
謝有泣下者平南靖南兩藩王兼鎮南海鹽穀絲麻輸
官價百倍而縣境羚羊峽產硯遣其掾采石日役黃岡

金石錄卷之十一
村夫匠無算篝火入巖穴有失氣死者公力減浮費掾
以硯奉公却不受人或比之包孝肅云師中索榕樹條
為緇繩以燃礮火風雨不熄有百夫長持軍符下縣徵
解語不遜公坐而撻之泣告其帥帥愬之制府王公國
光王公語曰書生彊項庶吏方剛是不可犯乃杖百夫
長薦公於

朝故事州縣守令歷再期始預薦牘三年方報最其次
給由量銓公治高要甫一載就徵洵異數矣

世祖章皇帝召試者再授兵科給事中時

駕數幸南海子公首上疏請慎起居其略曰郊原陟歷
雖非畋游可比然獸起於前馬逸於後驚屬車之清塵
不能無萬有一危之慮

世祖震怒宣公跪苑庭面數其罪公神色不動

世祖徐為霽容尋備陳廣東八害大指謂委署太濫雜
派太煩里役無定例用夫無限數鹽埠日橫私稅日盈
砍柴采木肆流毒皆切中時弊且云以敝劫之粵民任

兩藩王之公務為力不支目今川貴底定合移一王坐鎮其地斯則盈庭不敢置議者公以小臣新進獨奮舌及之既而靖南移鎮福建人咸謂公之啟沃上協

天衷者深也明季東南文士倡為復社海內應之著錄者二千餘人其後十室之邑三家之村莫不立有文社涖牲以盟張樂而讌與者結路人為弟昆道不同則親懿視同讎敵凶終隙末靡所不有公上言朋黨之禍釀於草野欲塞其源必先杜絕盟社得

肯飭學臣嚴禁焉由是士知閉戶讀書各敬其業公事
世祖歷三垣三載疏前後三十上嘗一日而上九疏於
是臺省敢諫之臣數浙人居多而輿論以公於天下事
獨見其大羣推公居第一今

天子即昨方在諒闇奏事者見顧命輔臣皆長跪公入
獨立而語輔臣以目送公曰此南苑上書諫獵者也自
是奏事者不跪及復起掌刑科印歲在甲辰冬有星孛
於翼軫抵降婁公之同官有言此名含譽星為今

金史卷之八十一
天子受命之祥非彗也公上言宋咸平初彗見營室明
成化中彗掃三台出天田入太微垣考其時或下詔求
言或允羣臣言修省故不為災敢請

皇上清宮齋戒力圖修省發

德音下

詔旨廣求直言詳詢利病有可惠百姓者立賜舉行并
飭内外文武大小臣工滌慮洗心共修職業則無難轉
禍為福

天子以公從直建言可嘉優

旨答之遂赦天下公於天安門聽宣讀赦書是日接
御前發下紅本二獄囚當決吏籍紙尾進請抄發公曰
昨頒赦而今日行刑是

詔令不信於天下也紅本當封還同官皆變色爭言不
可公曰六科以封駁為職古也吾封之咎吾任之不以
累公有

旨三法司再議二囚得不死用是直聲益震朝野公之

出撫貴州也湖北川東甫定道次銅仁無一卒之衛賊
烽火迫城下官屬請避去公曰銅仁黔地巡撫身任封
疆去安之因命燔其後山開南門以待偵者賊疑有伏
不敢前既至貴陽疏立營制禁侵掠蠲賦稅省力役安
集雁戶俾有寧居師旋有約束不明者輒上章劾奏軍
中號為楊一本舊例苗名長官謁見巡撫必鳴鼓角交
戟支于門俾拜其下公曰無庸引至座前問疾苦予以
飲食土司咸輸服公之始至也貴陽斗米直五千錢公

請餉之章屢告輓運相繼士飽馬騰民獲宴安版圖既
復翦其荒茅叢菁教以耕耨比及三年芸鼓稻田遂成
樂土

天子嘉公成績特

召為兵部左侍郎公在行間久諳習軍政西南徼將弁
多公拔擢以是入贊中樞若明鏡無塵雖遠畢照及歸
養北堂晨羞夕膳而以糲糲自甘遇簞笠舊交胸無水
旱冰炭田衣山屐舍車而徒行道者不知為一品貴人

也公之文學早見知於

世祖稱公所上奏章盡好文字迨巡撫

命下入謝

賜宴瀛臺舊例止予鞍馬甲冑而已公獨拜

命騎入東華門加賜白金五百兩表裏各十段以行

天子時巡公迎

鑾三百里外

御書松喬堂扁俾懸於宅訃聞

賜祭葬如典禮公所撰有黃門疏彙二卷撫黔奏疏八
卷政學編一卷景疏樓詩文十卷自怡集一卷曾祖鸞
祖萬年不仕考試學官弟子均以公貴累

贈光祿大夫娶唐氏

誥封一品夫人先公卒子男四人中訥康熙辛未庶吉
士授翰林院編修加二級慎言戊午副榜貢生中哲國
子監生選授廬州府通判中吉歲貢生女一人嫁國子
監生陸世璜孫男九人守知庚辰進士淮安府同知餘

未通籍孫女八人皆適士族曾孫女二人尚幼公生於年月日卒於年月日夫人唐氏生於年月日卒於年月日康熙丁亥十一月中納等卜壤於縣治東三十里湯家峴合葬公夫人于新阡先期來乞碑銘彝尊昔游嶺表舍館公所於公為老賓客知公為詳念公一語一言必準于古從容以和和而能介剛無虐簡無傲徵不清撓不濁其盛美不可得而具書特粗舉大綱焉爾系之

銘曰

鹽官漢縣左海環之百谷所歸曾不盈而篤生楊公文
武兼資學原王鄭書偕褚薛早貢成均如圭琢切名高
淡墨柳袍是纈牽絲奉檄百里瞻言不畏彊禦不憚上
官憂民之憂晨暮罷餐公之宰邑暮月而可

帝有恩言夙駕鳧舸入居八舍掖門之左袖書諫獵首
犯逆鱗雷封雖過哀彼瘠人有言無隱有氣必伸息事
寧人輕徭薄賦貢緣務絕朋比用杜譬諸樹藝先去其
蠹入告我

后敬天之渝星違其次修省是圖

帝曰直哉乃下赦書古給事中塗歸駁正降而結舌有
順無爭公當疾風草心尤勁謂赦既頒決囚非宜封還
詔旨侃侃不阿法司服念出諸網羅臺諫陳言發部議
事所司覆奏曰毋庸議公斥其非儼於有位粵稽帝典
納言命龍周有伯罔僕臣是庸若三獨坐尤庶所宗
帝曰黔南寇虐未過誕弄銀章俾撫天末公拜稽首爰
辭

禁閭通者懷之遠者綏之策我庶士張我六師犂童爨
女烝然來思反側既安疆宇日闢伐其棘荆播以黍稷
乃亦有秋樂國樂國

帝眷勞臣入為司馬袞衣遄歸薄言觀者公望公才舍
公誰也今之仕者莫有遐心知進不退終焉陸沈公請
養母孝思足欽天之報施於善人厚子孫繩繩各佩章
綬百祿攸宜克昌厥後既得吉卜神兮式馮丸丸松柏
秀于岡陵我銘以實國史是徵

光祿大夫太子太保刑部尚書李公神道碑

世祖章皇帝光宅方夏北燮東漸雲雨賢才肇開景運
於是故兵部侍郎長山李公方退居閭閻奉母宋太夫
人遂北堂之養順治元年起自田間

召至闕下授工部右侍郎未幾轉左侍郎三年夏請假
省親旋里既還

朝以原銜掌兵部右侍郎事尋遷兵部左侍郎兼都察
院右都御史八年秋

覃思加太子太保又明年冬拜刑部尚書十年夏四月
帝張讌瀛臺

賜大學士以下坐酒行從容詢諸臣父母有無公伏地
對曰臣有母年八十三矣魯經有言一則以懼烏烏之
私時縈寤寐也因泣下

帝為動容謂諸臣曰人之行莫大乎孝子不能盡孝於
生前而欲盡孝於身後朕不以為孝也公乃復以省親
上請

帝曰卿之事親朕深悉之遂

賜馳驛還公諱化熙字

闕

別字五絃先世自真定來

強遷濟南之長山曾祖考光先祖考迺春考夢鳳皆以

公貴

誥贈如公官母

封一品太夫人公以天啟四年舉于鄉崇禎七年進士
出身起家湖州府推官歷監司巡撫總督所至有惠政
顧不自以為功人咸稱為長者及仕

皇朝在兵部革班軍止運大布邊衣在刑部復熱審朝
審舊例請仍差恤刑司官著為令大綱悉舉而終身孺
慕者母氏家居一十七載晨羞夕膳侑以絲竹率昆弟
子姓融融怡怡承歡盡力治別業於近郊植果千頭花
時爛若雲錦御板輿樹下公進觴酒于前公弟監察御
史文熙暨諸孫羅拜于後大小東目為神仙中人公卒
時年七十有六訃聞

天子勅翰林院撰文致祭給帑銀營葬明年夏巡撫山東

工部侍郎兼右副都御史宛平劉公芳躅以命婦一品
百齡疏聞於

朝得

旨建坊里第而公考宅于祖塋之北古城之南左都御
史淄川高公珩銘其墓公娶沈氏

誥封一品夫人子八人因之河東鹽運司同知死姜瓖
之難

贈山西布政司右參議漑之灤州知州餘未仕女五人

均適士族孫二人斯祥早卒斯佺今官兩淮都轉運使
管鹽法道事曩與予定交久茲以幣來請補撰先公神
道碑立隧道之左予惟公佐司空贊中樞位三獨坐掌邦
禁階宮保仁被於天下事載諸

國史可以不書特其百行一本乎孝人所難能名公鉅
卿之養親逮於百歲者世亦不多見也乃書公晚節系
之以銘其辭曰

濼源有水匯于大東巖巖者岱泐泐者風篤生元老望

峻家邦匪祿是干惟親是顯自從三簋五鼎十鬻色養
無違儀文有腆

世祖特詔賁於丘園汝掌邦土蒼玉佩旃廐馬斯錫袞
衣自天撫仕遺榮寧親通止舞綵于堂有同孺子慈顏
既和謁

帝有喜升華副相襄贊中樞殊階宮保寵命尚書祥刑
敬獄重典克除

帝讌瀛臺三漿十酒咨爾公卿誰無父母委質以來孰

存孰否公拜稽首彤墀之南微臣有母年八十三一則
以懼寸心用悞

帝聆公辭見公出涕迺降

恩言孝經合契菽水之懽勝于喪祭公因請假

帝曰俞哉有命馳驛畫錦而回公願既遂循彼蘭陔筭
長魚肥茶香飯白滿樹鶯花一庭裙屐如彼墉宮長侍
瑤席公之辭世母已百齡門有綽楔輦革丹青又越五
載始御雲駢惟公事親孝乎惟孝母氏劬勞庶幾仰報

我作此銘通國是告

曝書亭集卷七十一

欽定四庫全書

曝書亭集卷七十二

翰林院檢討朱彝尊撰

墓表一

丈林郎湖廣道監察御史王公墓表

濟南之新城去郭二里鄭潢河東有湖廣道監察御史王公暨妻子孺人合葬之墓累土于旁封崇四尺者公子儒學生員士和之兆也公諱與肩字

永錫一字百斯曰重光貴州布政司左參議贈太僕寺少卿再贈少師兼太子太師兵部尚書公曾祖考也曰之垣戶部左侍郎贈戶部尚書再贈少師兼太子太師兵部尚書公祖考也曰象賁戶部廣西司員外郎公考也曰象晉浙江布政使司左布政使公本生考也公中崇禎元年進士改庶吉士試授湖廣道監察御史巡按河東鹽課羨金數百鎰皆却之視茶馬陝西邊境肅清尋奉命督應天

學政將行上疏勅總兵官鄧圯玩寇忤大臣意引疾歸
歸九年李自成陷京師帝崩煤山公聞變慟哭將浮於
海行至利津海多盜不可行公嘗覽方書謂冰片多服
能死人遂命僕購之僕市偽者以進公晨夕服之不死
夜起投水者再僕衛之又不死公乃迴舟抵里求死愈
決自撰壙志以四月二十六日暨妻子登樓齊縊死遺
孫啟沆僅五齡士和絕命辭曰痛予生之不辰今天滅
我之立王吾父母一聞之兮涕霑沱以傍徨以身殉國

難兮維千古之臣綱嗟反面而事仇兮方臣妾之未遑
哀世穢濁兮四維不張大地無容身之隙兮願隨吾父
母歸於帝鄉公卒時年五十有六于孺人福建道監察
御史青城于公永清之女卒時年五十有五士和為人
坦易博綜經史書學李北海能神似卒年二十有八公
遺教莖從薄從速遂以其年某月不卜日而葬葬之日
觀者千人偽順縣令賈三俊聞之亦來觀衆爭持土石
擊之三俊棄縣印遁去久之公從子令戶部四川司郎

中士禎刻公遺詩以行公之大節漸聞當世又慮傳之不遠也乃伐石為表命其友朱彞尊為文揭于墓道於是公之沒三十有四年矣嗚呼士大夫不幸而遭國難其始皆有捐軀之一念臨當引決或情牽於婢妾或僮僕援揅小不忍而自全若夫撓之不奪臨難忼慨就死固人之所難能至鋒刃未迫于前鄉里可保而守乃還聞君喪率其婦子從容就義一室之內非事之出於尤難者與先是崇禎五年十一月援遼師變掠新城時則

公之從叔象復及子與夔死之十五年十二月城再破
公之弟與玫與朋及與朋子士熊士雅又死之至是公
父子夫婦又死之而士和妻張氏於十五年城破亦自
經死方賊兵之陷京師也大學士范公景文以下死者
二十三人事聞江南江南草野士交填膺扼腕謂三百
年養士之報盡節者不宜寥寥若是遂持論書義誤國
科舉可廢彞尊時尚少亦助之憤惋不平久而游四方
歷戰爭故壘訪問耆老則甲申前後士大夫殉難者不

下數百人大都半出科第而新城王氏科第最盛盡節
死者亦最多然後知報國未嘗無人而往時草野之論
特一時過激未得其平也象復字完初保定府同知贈
光祿寺少卿與夔字風虞萬厯二十八年舉人贈宛平
知縣與玫字文玉與朋字壽三貢生士熊字渭濱崇禎
十五年舉人士雅字大雅生員皆盡節之士附書之

封奉直大夫顏公墓表

公諱伯璟字士瑩山東曲阜人中憲大夫知河間府事

諱脩紹之子贈文林郎江都知縣諱弘化之孫處士諱
從麟之曾孫而復聖顏子六十六世孫也母曰孟孺人
公少補四氏學生員讀書卓犖自喜不治章句人或勸
之銳意仕進則曰世事如炎火燎原者將及于厦處堂
之燕雀吾不為也從其父歷鳳陽江都邯鄲事無纖鉅
侍對必中理河間兵至中憲公修渠蟾為禦城孤乏援
不支衣朝衣朝冠北向拜集家人一室中舉火自焚死
公暨弟伯玠時家兗州府兵亦至登陴以望鳴鏑自西

來集于譙門城將陷兵民皆竄公性肥不能駛足伯玠
性瘦善走手掖公以行步益窘公曰同死無益弟亟去
猶可活也伯玠不肯釋公紹弟他顧自城躍下伯玠俯
視慟哭矢及其身而卒公仆地傷左足極夜乃甦為邏
卒所得見公修髯廣頤狀甚偉不敢害車舁以告其帥
公見帥不為屈帥驚曰吾略地以來未嘗見有此人問
之則顏子之後遂延之坐留帳前遇復有被掠者對公
偶語曰昨見城中婦女十數輩邏卒驅以走中一婦不

肯行卒反刃擊其臂臂折猶罵不已卒殺之牆下有媼過之指曰此顏氏婦也公曰得非吾婦乎語其帥同被掠者至牆下果然蓋及傷已四日矣驗其息猶未絕載之還即今朱宜人是已帥謂公曰而日念而父然兗州破時河間之陷已一月矣公聞之長號力請於帥帥護之出軍壘公留朱宜人於曲阜足尚跛蹠跚走河間時盜賊充斥於路或積日不食每被執公慷慨與語輒得釋卒達河間哭其父甚哀路人皆泣中憲公之自焚也

幼子伯珣甫六歲其僕呂有年抱之出火負而走塗中
流矢死伯珣匿民間得免公既拾父遺骸訪得其弟遂
與俱還俛尚書元璐中憲公實出其門會道經河間為
文以祭曰父忠子孝是吾師矣由是公以孝聞一時公
平生坦易不沽名譽暇則抽琴賦詩與宗黨結文酒之
會取怡悅性情而已遇人甚溫而家法嚴以肅友愛季
弟同居無間言訓子孫以博通經義恒自言吾壽止六
十一卒之歲果驗公生于某年月日卒于某年月日

封奉直大夫娶朱氏封宜人有子七人男六人光猷翰
林院編修光敏吏部稽勲清吏司主事光政光枚光孜
光燾俱四氏學生員女一人嫁孔學熒孫十四人男六
人女八人彝尊獲交吏部君久繼又識編修君公之卒
于陋巷里也兩君咸官京師聞親喪辟踊盡哀涕與血
俱四方觀禮者有顏丁善居喪之目既成服而後行將
歸葬公于侍郎之林請為文表諸墓嗚呼公父死于忠
公蹇而走千里白刃塞于前曾不少懼其不死於孝者

僅爾乃其配烈婦其子又孝子也以孝子之請表孝子之墓此文之無可辭者也雖然布衣之言不足重于時久矣故夫欲榮親者必資卿相殊階揭石於原始足動人之觀覽兩君舍彼勿求顧屬之彛尊殆以其言之質庶幾可昭信後世也故論次刻碣無溢辭

處士繆君墓表

鄉有篤行君子曰繆君其言曰人宜惟貧之足患惟富尤足患爾故終其身處約取舍介然不苟見人無賢愚

容色必恭親戚富貴者或經年莫之過也其為人質訥
望若田夫野老叩其學疊疊不窮間為詩歌取自怡悅
而已不輕出示人所居堂三楹甃以甗其考妣蓬戶脩
然有自得之色鄉鄰素苦徭役貧不支君每代之輸不
責償也遭亂里西偏多盜相戒勿入君室有子永謀能
文章君教之隱遂絕意仕進授經生徒以為養不給則
游於四方歲一歸視君困輒復出而君竟以年月日病
卒年七十有二孺尊來京師值永謀將歸葬君於舍旁

請為文表君墓嗚呼士之患在汲汲於榮利既污其身
復導其子弟倖進與夫學有未實而盜虛名力能援人
矣而吝于出納其與斯世何賴焉君之名不出百里後
進以為宗屢空於財而鄉鄰受其惠又能毅然出處之
際教其子義方至困阨以死而不悔非信道之篤能然
與君諱某字孟思嘉興縣人曾祖某祖某考某世有隱
德娶吳氏子男三人最少曰其器亦能文女四人孫男
六人女六人

前進士高公墓表

奉直大夫協正庶尹工部虞衡清吏司主事高公之墓
家有狀墓有銘阡有表遺行亦既詳矣歲久舊石剝落
其子佑鉉乞其友朱彛尊復為文揭於墓門之外彛尊
以公晚遜于野賦詩有云惟將前進士慘憺表孤墳迺
改書額曰前進士表曰公諱承挺字寓公一字澤外先
世河南人遠祖遜志由蕭縣徙嘉興建文中吏部侍郎
兼翰林院學士徙太常少卿嘗與方公孝孺同主京闈

己卯鄉試靖難兵入潛走東甌雁蕩山中是秋病死及
門翰林侍書蔣兢斂而葬之芙蓉峰北曾祖文登隆慶
丁卯鄉貢進士知膠州祖林贈奉政大夫考道素萬厯
己未進士以工部營繕主事奉命督造桂王府於衡州
與內官監黃用分工並建既落成進屯田司郎中逾年
烈風雷雨作用所築寢宮圯法司竟坐道素慘法死公
聞父變蹕踊見星奔扶櫬以歸服除授牒學使者願棄
學官弟子學使者不允時蔡公懋德以布政司叅政轄

嘉湖力勸公謂男兒不立功名父寃安得白乃復就試
崇禎己卯舉于鄉明年中會試賜同進士出身除知遷
安縣事縣故彫敝公平夫里減浮稅招流移民樂其惠
調知寶坻縣縣京師之左臂也崇禎九年失守瘡痍未
復君至畫郊圻均田賦濬河漕嚴自宮之律免剝船解
戶之擾再朞而政成十五年冬

太宗皇帝兵踰界嶺自黃崖口入君聞警集邑人于漢
前將軍關侯祠而曰承埏守土吏也城存與存城亡與

亡吏效死勿去固為朝廷守封疆亦不忍爾等父母妻
子室家墳墓之委棄也爾其一乃心力毋作神羞衆皆
曰諾乃治守具製懸簾束葦加土俾火不能灼樹旗幟
架礮石分設士卒于四門俄而薊州下師從豐潤渡河
連十三營集城下君悉士卒登陴以守多掘井泉分汲
斂雞犬於城中央廢寺令既嚴肅夜寂無聲攻者曰此
啞子城也兵法不易拔越九日引去衆交賀君曰師還
必不我舍乃添繕守具築礮臺鑿郭外溝千三百七十

七丈塹坑二萬二千且誠梁城所千夫長選力士為游
兵策應并檄蘆臺巡司練鄉兵防禦十六年夏四月朔
師復來攻連營一十五屯二旬有四日公堅壁不戰間
出奇策奪馬羸羊豕收集羈僇難婦資之還鄉當是時
王師自薊乘勝下畿南轉而山東連收九十餘城所過
若破竹獨寶坻彈丸地援師莫有至者公以一書生率
校官主簿尉固守城卒以全事聞莊烈愍皇帝有高承
埏全城却敵功在封疆從優議叙之褒僉謂當加拔擢

矣會計吏有選人持之反以才力不及調簡改知涇縣
嗚呼刑賞者馭世之大權也功罪之混淆將使人莫知
勸觀於黃用之獄釋有罪殺無罪已失不辜至於寶坻
去京師二百里而近去一勞吏人主不知宜任事者解
體而忠義之士聞而悲憤填膺者也君知涇縣閱十月
謳歌滿野入主虞衡司事亟上書為父訟冤有詔復原
官君廼請歸侍母屠太宜人盡潔白之養嘉興城破誓
墓不出隱居竹林村窩聚書八十積多至七萬餘卷所

著詩文有稽古堂集嘗取先儒詩說五十家撰詩義裁
中一編其序畧云明道程子謂詩學必於大序中求伊
川則云序非聖人不能作蓋淳熙以前無舍序言詩者
淳熙而後遵朱子集傳廢序者十之九矣孔子曰詩三
百一言以蔽之曰思無邪序所云發乎禮義者無邪之
說也本乎孔子者也孟子曰以意逆志是謂得之集傳
去序言詩求詩人之旨于千載之上以意逆志之說也
本乎孟子者也吾因二者而裁其中焉於國風淫奔諸詩

仍存舊序其餘則以朱子為歸而五十家之義附之非敢
異於于朱子也竊取二程之言亦孔子之詩教然爾學
者以為篤論君年四十六而卒子三人佑鉅長也孫七
人洪謨早列為諸生慧而天公晚輯自靖錄紀崇禎以
來殉節諸臣迄歲丁亥止佑鉅續之又徧歷公所宰
三縣訪其故老拜遺祠載公政績於縣志茲麓舉大綱
具書全城一事庶國史有徵焉

布衣周君墓表

君諱賁初字公貞更字青士又字當谷先世居父山之麓千金圩徙嘉興之梅會里曾祖考某祖考某考某皆不仕君幼治書年十九喪父居憂讀喪祭禮鄉黨以孝稱遭亂乃棄舉子業不治就市廛賣米府城初破有括故家遺書連船載以鬻于市者君買得一船積樓下每日中交易箕筭斗斛權衡堆滿肆撥亂書糠粃中吟誦不輟其為古今詩超超拔俗不輕襲前人片語時同里王翊范路路弟子繆泳交賞君詩會予移居市南而海

寧朱一是亦來僑居里諸生沈進布衣李麟友皆與君
倡和四方名士過者君輒留飲或釀金會餐泊舟于門
相接也君奉母孝膳必具酒肉與人交胸無柴棘人有
匱乏傾肆中錢米給之有戴丙驚女于巨室及笄將以
配儻僕君亟贖以金為擇壻以嫁采石估載米八百斛
得二千金貯君笥估獨往硤石中道溺死君具棺以斂
手書呼其子至傾笥還之歲潦率私錢散米以食餓者
君既急人難又交游漸廣有請必應兼治母喪為弟婚

遣女嫁由是生計日窘往來嘉善桐鄉以詩格授人每
出少年子弟三五執詩卷隨之行援止者或數日留留
或不辭去恒儻葛不羈嘗歲除忽挈舟泊臬亭山訪僧
靈童遂抵西湖又嘗元日挈子旼至武康銅井山尋禪
人行筏轉入徑山時已昏暮去山二十里雪甚虎跡交
于塗君循澀路前旼哭於後君不少顧還見林中燈修
修就之則僧墨浪所居僧曰山多虎居士遠來得不心
動乎君曰吾行不失道心一動則飽虎口矣僧方煨芋

魁因喚君圍爐話清淨理留信宿乃躋山巔徧歷七十
二精舍還又嘗獨行魏塘見赤馬船縛布為帆君問焉
往船人以入泖對君思就九峰訪故人請附載比及泖
則已暝船人促君登岸望見僧廬君闖入小沙彌見之
駭強君出君周步琉璃燈下覩壁間所錄詩牋有已作
指示沙彌曰吾詩人爾非賊也沙彌以語主僧煮白飯
止君宿詰朝自泖達九峰抵華亭遂訪高士吳騏王光
承之居兼旬乃返歲在辛酉予典江南秋試榜既發今

戶部侍郎德州田公雯為予張燕君適造予道遇吏部
郎曲阜顏君光敏偕之來布衣紉屨衆賓皆愕眙顏君
語曰此浙西詩人周青士也諸公未之識乎田公肅君
上坐懼飲而散自是燕予者輒及君有漆人頭為飲器
者坐客莫敢視君滿引三杓湖州太守江都吳公綺壯
之賦樂章贈焉游攝山道見石辟邪立草中宮碑二丈
餘將仆人不敢近君騎驢徑詣其下讀之知是劉孝綽
所製梁安成康王秀碑也是日投山寺客皆倦君登絕

項賦詩於是上元鄭簠以分書題名于壁常熟王翬為
繪作圖予滯京師君念予不置會太僕卿色公聞君名
具書幣屬有司延君敦促就道既至留二年率在予寓
居合計舍色公家不過五六旬也在都下未嘗投貴人
一刺朝士願交君者一飯後君不復過其它尚書崑山
徐公乾學好延攬海內士徐秀才善主其家君嘗就善
同卧起徐公欲見終不見宗人子所愛小妻周買自楚
謂其夫曰妾實禾人公客貧妾季父也宗人子以語君

將令小妻出拜君曰貧農家子也聚族不及二十人未嘗有之楚游者拂衣出給事中某知君還削三緘贈行曰挾此可得百金荅曰貧不耐持竿牘伺候人却不受乃與今監察御史錢塘龔君翔麟浮舟潞河將抵宿遷猶眠食無恙忽晨起挑潁水一笑而逝年六十有五龔君為治喪還其柩以遺書付其子旼君所撰有采山堂集二十四卷詞緯三十卷今詞綜十卷析津日記三卷投壺譜一卷君先娶李氏繼娶曹氏子四人長旼國子

監生次某次某天次某女一人嫁某孫男一人女四人
君之歸葬也殯于水月僧院後十年子旻等始克葬君
于仙橋原伐石表其墓予惟君視朋友同一身其後交
游徧天下然氣類尤篤者里中諸子也因仿柳子厚獨
孤申叔墓碣書故友姓名于後稍加詳焉

王翊字介人以布衣稱詩見賞於陳推官子龍為之作
序有秋槐堂集

范路字遵甫自蘭谿遷長水經亂賣藥於市有靈蘭館

集

朱一是字近修崇禎壬午舉人後不出里居授徒著為
可堂集

王沆字千明秀水學生有文行君與隔水居還往尤數
含山盜起晝劫梅會里沆被執家故貧勒贖不遂遇害
沈進字山子嘉興學生早年詩尚清麗與周君同調鄉
人目之曰周沈晚編所作為藍村集歸於沖澹又輯文
言會粹二卷行國錄一卷

李麟友字振公揚州學官自明次子史可法兵敗自明
自縊學宮麟友求其父骨不得遂棄舉子業其詩慷慨
奔放不屑裁剪字句

朱彞鑒字千里予同懷弟也精篆法善畫兼工藝事嘗
聽經師講詩小戎章誚其昧於車制乃削木為小戎市
絹人馬御輪執轡欲觀者出示之詩長於送別有笏在
堂遺橐

褚標字霞建詩饒風韻天卒

周篁字林於君從弟別字鷗塘以名其詩集

曝書亭集卷七十二

欽定四庫全書

曝書亭集卷七十三

翰林院檢討朱彝尊撰

墓表二

靖南王墓表

開國輔運推誠宣力武臣靖南王既薨三十年

天子命反葬遼東於是王孫多羅額駙太子太保鎮平將軍昭忠自福州護遺骸以北葬有日矣和碩額駙太

子太保聚忠請為文表其墓按王自登州航海攜軍民械器歸

太宗文皇帝功在草昧多不勝書具載實錄今以聚忠所能記憶者述其大略表墓道焉王諱仲明字雲臺先世山東人徙蓋州衛生而面深黑手掌潔白如玉軀體偉長個儻有大志疎于財多智謀以登州參將來降

太宗嘉悅給總兵官勅印崇德元年四月冊封懷順王從攻旅順口克之止勿屠戮從攻朝鮮擊破援師拔其

城朝鮮平還治戰艦從攻皮島取之是歲大饑斗秫白金一兩王轉粟以賑全活島民無算從攻松山杏山塔山中後所前屯衛王令將士屯田次第克之順治元年世祖章皇帝治師討賊入山海關方是時賊鋒甚銳聚黨十萬迎戰關門王率所部兵奮擊大破之乘勝追逐至慶都縣又破之賊軍委金帛于路以緩追者王號令夙嚴將士無利心追奔益疾躡至潼關復大破之李自成走死旋徇河南諸府悉下遂渡淮拔揚州下江南所

至功居最四年進兵湖南抵武岡擒梟將劉肇基收湖南六年五月

世祖以金冊金印封為靖南王俾定廣東統軍作鎮南海王盡散其貲給軍士運以車牛軍士咸樂附是年師次吉安府王薨于軍

世祖念王開國勲旋冊王長子繼茂襲封靖南王王性純孝友愛二弟宗卹貧不能婚葬輒傾囊以助人有小德雖一飯未嘗忘報軍所至以招徠為先務圍城破軍

令當屠必力爭于親王之統軍者松山之戰明總兵官
王廷臣死焉王與有舊贖其尸焚而瘞之或以訐王

太宗嘉王之義勿罪也自王薨後子忠敏王函王骨載
之行聞始厝于廣州繼移厝福州蠻煙瘴雨之交烽燧
矢石相向而遺骸得以無墜不可謂非厚幸惟

天子仁聖始終念王之功王之精爽亦有以答之存著
其號亡顯其名卒歸葬于鄉井釣游羽獵之場予治之
地距

太宗寢園密邇魂氣徜徉在

帝左右王之靈庶無憾于泉下矣王生于某年月日其葬于益州馬蘭峪也在某年月日厥配贈太妃郭氏李氏祔焉竊嘗覽觀載記曩代功臣封爵之典遠及苗裔盟以白馬信以丹書俄而獲罪至酎金小過奪其侯封每致慨報功之薄若王則紹封奕世其次尚主為近臣或專閫于外迨王孫精忠逆命

天子猶加恩于王暨王諸孫如故嗚呼本朝所以待開

國勲臣者厚矣凡此皆宜表諸石以昭垂無窮者也

德州田君墓表

德州田君者其為學以躬行為本雖燕居必危坐置歷頭案上日較行事得失以朱墨別之其治家有法度庭以内不聞婦人語居父母喪盡哀奠祭以禮遇其弟友愛親懿有爭必為解紛挫銳然未嘗詣公門也恒以經義教授鄉黨從之游者多取功名而君終不遇以順治五年二月卒後七年君之子緒宗成進士知處州麗水

縣事既而亦卒久之君之孫震與其弟需皆中進士震歷仕為湖廣布政使司參議入為卿寺需官翰林院編修於是伐石而镌焉屬其友秀水朱彝尊為丈表君之墓表曰

君之先常山國上世晚徙安德祖三戒承德郎廣吏稱著考堂厥父高母丁族子四人君也叔裕所字實粟名州儒學補諸生其省疎其顙廣履方舄曳鄉杖行有穀詒子孫井吉壤高墓門表吾文永無泐後之人庶不惑

吏部驗封清吏司員外郎卜君墓表

康熙二十八年冬十有一月辛亥奉直大夫吏部驗封
清吏司員外郎秀水卜君以疾卒于官年六十有二鄉
人交哭于牖下慮無以斂啟其篋無銖兩金錢視其盎
無升斗粟發其笥惟朝衣一襲餘皆以付質庫其空乏
如是嗚呼斯可謂廉也已君諱陳彞初名之儀字聲垓
別字簡菴曾祖知雲南尋甸府事大有祖知福建清流
縣事曰謀考贈承德郎兆龍妣伍太安人以苦節

詔建坊表閭閻君少孤奮志于學未冠補秀水縣儒學生
員時東南士子各結文社歃血盟誓以攻不附已者雖
懿戚密親至互相詬詈君集里中善詩者共酬和不樹
黨也順治十七年舉省試康熙三年會試中式

賜進士出身十二年除陝西洛川知縣洛川李自成鄉里
人多習為寇君至練鄉民勇者砮各有長使之守望明年
春聞吳三桂反行之益力是年冬王輔臣叛寧羌殺經畧
莫洛延安震驚又明年春柳溝帥李師膺殺韓城知縣

以叛定邊副將朱龍亦叛洛川民愈恐君匹馬詣宜君營乞師于參將楊某僅得兵三百人賊軍猝至君登陴固守賊以計誘洛川民使縛長吏以降衆皆曰我父母也不可城以是獨全未幾丁母憂歸服除補武昌知縣凡八年以卓異舉入為禮部儀制司主事調吏部稽勲司主事遷今官娶陳氏先卒贈安人子二彭年彭頤孫男女六人君卒踰旬而彭年適至哀毀盡禮扶君之柩以歸葬于某阡陳安人祔焉噫今之號為廉吏者布衣

藿食所識窮乏者力拒之又或許發人贈遺以為自進之計以寡則不取以多則取之惡在其能廉也君口未嘗以廉自矜而能處膏脂不潤或疑其才有所短夫豈然哉是嘗率敝効之民却方張之寇保彈丸之城而報最于盤錯之地者也蓋其取與之介正其義而有所不屑焉吾故特書之表于其墓

封文林郎韓君墓表

彝尊謫官居京師之灝村晨出僕言有客登吾堂載拜

以其先人之墓表為請問其姓名則主事山西韓象起僕告于主人未之許也讀其狀作而曰安得此長者乎是宜表其墓文曰

君諱某字某先世自相州遷于洪洞六世祖文歷官太子太保戶部尚書以劾劉瑾削籍瑾誅復官卒贈太傅謚忠定曾祖某祖某皆不仕父某官濟南府通判母亢安人嫁時裝匱所直累萬父沒君悉以讓其兄嘗為學官弟子有忌者潛賂當道遺書學使俾黜君其僕誤以

書送君所君覽書色不為動仍封完與僕聽其投學使
家人疑君過矯君曰人將甘心于我一發不中將更計
矣不如遂之竟被黜徙居天津用鹽筴起富然不事纖
賁有負者輒焚其券不責償也象起知福山縣事迎其
親養于官舍會

覃恩勅封君文林郎君卒時年七十有六配洪氏中書
舍人世臣之女封太儒人卒年七十有八子一人象起
也於戲今之葬令自一品至七品以下皆得琢石為表

至於其辭不繁不溢斯為可信昔昌黎韓子未嘗妄譽人者顧劉又訕之謂為諛墓蓋多貨則傷於德幣美則沒禮君子之所不居也惟夫無所利而言之者庶幾不失其實則予表君之墓其可白于僚友而信于後世者夫

翰林院侍讀喬君墓表

翰林院侍讀寶應喬君以疾卒于京師其子崇烈扶其柩歸葬于縣治東南箕山之陽乞檢討吳江潘君耒銘

其藏又請彝尊為文伐石以表君墓君萊諱子靜字別
字石林世為寶應人曾祖邦從祖份不仕父可聘明天
啟二年進士掌河南道御史以廉直聞母王氏有壺行
君中康熙二年鄉試六年

賜進士出身除內閣中書舍人十一年充順天鄉試同
考官關節不到以父老請歸終養尋丁憂居喪盡禮服
除補原官十七年有

詔舉博學宏詞備顧問君被薦明年

召試體仁閣下賦詩居一等改授翰林院編修纂修明
史史館初設在東安門內肩輿不得進君體肥窘於步
趨騎羸一頭辰入申出考稽典籍念崇禎朝乏實錄與
同館四人先撰長編以資討論會廣西平補行鄉試君
奉

命主考稱得士還充

太祖高皇帝實錄纂修官實錄以國書譯漢文文義後
先恒齟齬君能曲暢本指一濡削語簡而事加詳經進

天子稱善時

上再試詞臣悅君作曰喬萊學問優長文章古雅爰命君充日講官知起居注尋遷左春坊左中允纂修

三朝典訓進翰林侍講再進侍讀

皇朝漕運沿明舊制自淮入河以達會通河既失故道從安東入海清口日淤淮泗泛濫由洪澤以南諸河下注治河使者又開減水埧洩之淮揚州縣七蕩折離居穡事俱廢天子覽臺臣奏濬海口以瀉積水遣使者相視還報可

乃出帑金命安徽按察使于公成龍董其役總督河務
都御史靳公輔上言海口高于雲梯闕五尺疏海口則
引潮內侵大不便因請築堤束水使高置二牖于邵伯
鎮南高郵州城外泄洪澤盱眙天長之水俾入隄自車
邏鎮築橫堤一道抵高郵自州城東築大堤二歷興化
白駒場至海口東所洩之水入海計需銀二百七十八
萬有奇請先給帑而徐取償于田畝子粒綱鹽又請設
官二百七十餘員擇才能者任之疏入

天子下廷臣議多是河臣言適君入視直

上御乾清宮西煖閣閣臣奏事畢

上顧問君濬海口事宜君直前奏河臣疏非是

上悅曰此爾一人意見邪君對淮揚人所見皆與臣同
翼曰合戶科給事中劉國徽等十人持議河臣之言有
四不可行海口原有故道第令塞者通之淺者濬之俾
渟蓄之水悉趨于海斯已耳河臣議開大河築長堤堤
在內地者高丈六尺河寬百五十丈近海者堤高一丈

河寬百八十丈勢必壞隴畝毀村落掘墟墓慘有不忍
言者不可行一河臣之議先築圍埂用水車踏去埂內
之水取土築堤不知臣鄉地卑原無乾土況積潦已久
一旦取土積水中投諸深淵工安得成成亦易壞不可
行二河臣欲以丈六之堤束水一丈是堤高于民間廬
舍多矣伏秋風雨驟至勢必潰潰而南則邵伯以南皆
為魚鼈潰而北則高郵以北靡有孑遺即當未潰之時
潴水于屋廬之上豈有安枕而卧者乎不可行三至于

七州縣之田向沒于水今東河使高田中之水豈能倒
流入河不能入于河即不能歸于海淹沒之田何日復
出不可行四

上是君言河臣之議乃寢未幾君罷歸治廢圃曰縱棹
園壘石疏池刺小船往來讀易其中著易侯二十卷縣
志二十卷詩文集若干卷君之建議也于公頗德之及
出領河務值君歸恒以地方利弊諮君君必直言無隱
然終不干以私三十三年春有

旨召君入京師君既至鍵戶不接見賓客讀易著書如
常時居數月病作遂不起君居家孝悌謹事師友疎於
財恒周人急後進有一善為人誦其文不去口性不飲
酒好觀人飲竟席不倦嘗闢一峯草堂於宣武門斜街
之南暇與布衣紉履之士詩篇酬和退朝輒考證史事
同館有持異說者審其本末而匡正之不與之爭也河
議初出大學士梁公清標時為戶部尚書歎曰江淮之
間可謂有人君卒時年五十有三娶邱氏封宜人子四

人崇烈康熙丁卯舉人崇讓貢生卒崇修貢生崇禧女五人國祓其長女壻也次邱璋次任宸次朱經次黃之鈞孫五人

通奉大夫福建布政司使內陞汪公墓表

公諱楫字舟次世居徽州休寧縣至曾祖考某遷江都公幼補學官弟子既而屢試有司不遇以貢署顛榆儒學訓導會

天子特開博學宏詞科徵文學之士備顧問著作之選

於是巡撫江南靜寧慕公天顏以公名應

詔康熙十有八年三月朔

召試體仁閣下大官具酒饌授几坐讌罷公賦就纚纚
千餘言詩獨用險韻

天子拔置一等授翰林院檢討充明史纂修官開局東
安門內公請監修總裁官仿宋李燾先撰長編然後作
史乃取崇禎十七年事凡詔諭奏議文集邸報家傳輯
為長編由是十六朝史材皆備二十一年春琉球國王

表請封爵舊典用給事中行人各一員往

天子重其選

特命廷臣會推可使者以聞入

朝人多俛首畏縮公鶴立班中大臣遂以公對充正使
賜一品服臨發公詣

闕上言七事其一謂本朝文教誕敷

皇上方頒御書于封疆大吏宜并及海外屬國禮部以
無故事持不可

天子特允四條給鑾仗之半縹囊鈿函齋

宸翰以往既達螺江醴酒梅花洋百神衛護帆開風便
七日抵彭湖島中山王率所部郊迎公諭以

天子威德王及臣民小大稽首陳

天書殿中告諸宗廟琉球自隋始通道明初析而為三
其後山北山南復合于中山為一分合之故史不能詳
公思采入明史乃入廟觀所立主一一默識之撰中山
沿革志二卷又述其山川風俗禮義為琉球使錄闕卷

國王之讌公也酒半手自彈琴以悅公公故善樂律與
譚長清短側之辨王大悅服及請公書殿榜公縱筆為
擘窠書王大驚以為神國雖有孔子廟庠陋將圯公俾
修治既成為文刊諸石上頌

天子神聖聲教洋溢海外由是國人知學使還國王例
有餽王重公有加禮却不受

朝命受之乃受因奏琉球子弟願入國學

天子允之以公奉使盡職從優議叙俾宮坊官缺出用

適聞本生祖考訃乞歸治喪里居三年始就京師補原官是冬

天子加意民牧思得良二千石以為表率乃以公出知河南府事治績為中州最擢福建按察司使後三年轉布政司使莅官五載民戴其德

誥授通奉大夫

召入京師將擢卿寺公以疾告

屬車南巡猶強起迎于宿遷

駕至揚州衣朝衣伏道左

天子熟視曰汝老邪朕幾不識卿矣

宣賜御書未幾卒年六十有四公少與三原孫枝蔚泰州吳嘉紀齊負詩名所作務去陳言盤硬語又不墮澀體見者比之斬新花蕊書法以骨勝得楊凝式米芾之神自守郡後躬親判牘吟咏漸寡然海內稱詩者數當代大小雅材必為公屈一指焉所著有悔齋集公之通籍也同日入翰林者五十人予亦與焉久之睢州湯公

弒由內閣學士巡撫江南風俗移易民之頌德不衰公
繼為廉吏明刑數政而又奉使絕徼擅言語之科可不
謂難焉表諸墓庶後之尚論者以制科為可行匪獨丈
學之選已爾

贈中憲大夫知灤州事李公墓表

墓有表古也蓋自漢元初五年謁者景君始其崇四尺
其制圭首方趺其文由左而右誌石納諸壙中而表立
于既葬之後所以表封陌限樵牧述美功禮不可以廢

也兩淮都轉運使掌鹽法道事長山李君斯仝請表厥
考灤州府君之墓表曰公諱漑之字岱源世居濟南之
長山曾祖迺春以孫貴

誥贈光祿大夫太子太保兵部左侍郎都察院右都御
史祖夢鳳以子貴

贈如其父官考化熙累官光祿大夫太子太保刑部尚
書妣一品夫人沈氏公少習春秋年十五補學官弟子
尋以廕入國子監尚書公方仕于

朝祖母宋里居公婉容柔色晨昏定省問何食飲慈以旨甘奉養者三載深得宋太夫人歡心忘其子之在

朝也尚書公既

予告公亦不謁選人建芝煙閣于堂之左置經傳子史法書名畫枕藉其中與合志同方之友日事搜討旁及天官地志九流百家二氏之說靡不審其是非正其紕繆既而尚書公病劇公晝夜沉憂疽發于項繼以疾病

沉繇不離衾枕已無意牽絲奉檄矣吏部按籍除知灤
州灤故畿輔地俗悍難治公至鉏強抑暴御胥吏以嚴
愛民若家人父子節用以示儉鹽豉蒜果堂厨無大烹
會

天子時巡幸灤公力除官道峙糗糒羊豕禾耗悉出自
解舍鎔釐圭黍不擾民間公故多鬚畿輔稱廉吏者必
曰髯知州云及朞以盜案罷公之官于灤也尚書公在
堂去州治幾二千里每三五日問膳之使絡繹如織一

聞去官視同脫屣抵家五月而尚書公卒公於送終之
禮參酌古今情文兼摯又繼厥考之志養祖母宋者四
年孝子之後復有孝子可謂能子也矣公生於明天啟
七年月日卒於康熙十一年月日年四十有六娶于氏
江南提刑按察司使重華女子男一人斯佺也女二
人一嫁章邱焦舜同一嫁新城王啟深孫男闕人女闕
人

錢孺人墓表

嘉興李鏡明遠之妻桐鄉錢氏者歲貢生諱某之子廣西布政司右叅議諱某之孫贈兵科給事中諱某之曾孫而李君諱某之子婦兩淮都轉運使諱某之冢孫婦也其生以某年月日其卒以某年月日其年四十有九其葬也以某原有子四人曰某某某其女一人嫁海鹽王某明遠予友也力學而貧其祖運使公好結納天下名士卒之日家無餘蓄明遠少孤所受產有宅半區有田三十畝力不能接賓客恒閉戶不出自予之外相往

還里中者六七人而已予交明遠二十年入其宅四壁
蕭然而未嘗有戚戚之色則以孺人能安其貧無摧適
之言入其聽也孺人詳于禮謹于婦德事王舅如舅鞠
視幼叔小姑如子卑尊外內悉稱其賢所衣布裳澣濯
至補紉百結饘爨之供或雜以糠粃鄰婦驟見之不知
其生長富貴家也自其始嫁遭舅畧繼畧王舅當大事
者再娶娣婦二人嫡婦一人嫁女妹一人女子一人集
其貲費不為少矣然不告急于嫻族不稱貸于鄰里而

三十畝之田半區之宅卒保如故由孺人之勤斯能相夫子以不匱噫亦異矣孺人既沒明遠踰晷而哀值予歸自濟南請為文饒諸墓予謂女子之德不外勤與儉耳亦惟貧窶乃見若夫身處富貴不侈以蕩者有焉其何儉勤之足述而見諸學士大夫之表者往往揚詡過實諛墓之文覽者莫之信也惟窶且貧者不與儉期而儉至儉矣未有不趨乎勤者也然或慕人之有餘或怨己之不足雖士君子或不免焉若孺人之賢蓋匪直女

子之所難幾矣表諸墓庶幾予言之不失其實而明遠門內之化若此亦以見予取友之端焉

節婦陳孺人墓表

節婦陳氏侯官人縣學生張泰元之妻解元遠之母歲貢生兆奎之子封太僕寺卿朝斌之孫太子少保工部尚書某曾孫也年十九而嫁二十有一而寡是歲福州大饑人相食孺人奉孀姑叔水盡歡遠生甫兩月又善病退治藥裹釵鈿悉斥蒿簪布帛罷肉食教其子無惰

容稍長授以經書每至夜分必成誦乃寢家既貧勸遠
游學所至以詩古文辭見重朝士許為絕倫孺人以康
熙十六年卒時年五十一越二十二年秋遠舉福建鄉
試第一又三年請于有司旌其門葬孺人于府治東關
外登雲路是日送葬者數百人自布政司以下長吏咸
來告祭遠乃詣常熟王翬繪為圖請予文表孺人墓焉
予考漢制墓碑阡表之外又有石闕殆即今之墓門也
鄱陽洪适載漢碑式往往刻鏤車馬人物于碑旁蓋古

尚會葬多者至千人其子孫及門生故吏畫象以紀其
盛固其宜爾降及元初循宋掌故凡表門者必有聽事
步櫺前列屏樹烏頭正門閭闕一丈二尺烏頭二柱端
冒以瓦桷築雙闕一丈在烏頭之南三丈七尺夾樹槐
柳十有五步其後唯高其外門二安綽楔左右建臺崇
一丈一尺以白赤汚其四角而已遠今就試禮部取甲
第他日追遠之典可以仿諸曩代匪直祭告之具其儀
也且試鏡予之文摹畫于左右以為天下後世式可

哉

節孝溫孺人墓表


節孝溫孺人既卒其子沈琬狀其母壺行告諸鄉黨朋
友縉紳之士為作傳者九人序四人誄一人賦詩及贊
者不悉數也於是秀水朱彝尊因琬之請為文以表諸
墓溫氏門望為烏程最孺人者某之曾孫某之孫生員
模之子也生于順治二年十有二月甫三齡許配沈君
丈然丈然為舉人某之子南京刑部尚書演之孫工部

左侍郎贈右都御史節甫之曾孫家世豐于財大獄起人多利其有而文然兄始然坐與考官通關節被逮文然以同產弟當徙邊時年十六猶未婚槩謀于妻韋韋曰女嫁而壻夭常也今壻不獲留譬之夭可矣既字之宜生死從之槩曰吾意亦爾於是請之按察使錢公朝鼎公許脫桎梏就婚婦家時沈氏遺產盡沒入官有司勾稽隱漏不已又為惡少年告訐訟不解文然雖贅溫氏嘗羈司獄中以康熙二年四月北行八月赴刑部獄

明年出關抵尚陽堡又明年五月卒于徙所文然之未
行也孺人慮夫遭患難將遠徙生死不可料而翁姑皆
未葬夫去誰主之者不稽于卜不諏于葬師并槨而封
其藏文然以是獲拜先人丘隴而別孺人方有娠及去
乃生子琬恒泣涕教之其事文然繼母生母皆以禮沈
氏東阡大宅既入官簿先世木主或投之水中孺人
亟迎歸奉祀薦食毋缺當是時許沈氏者延及于楨
家亦破孺人愈窘歲饑潛屑大豆當飯而別治兩姑

之饌如豐稔時文然有兄某亦旅死關外其僕負兩人遺骨以歸兄弟不能別孺人祝曰天乎妾聞父子精血相聚夫婦何獨不然乃啣指血滴于骨其半淹漬深入拭之不去則取而掩之孺人沒時年五十有二琬受孺人教好學有文得孺人遺詩于笥刊行之初娶于吳再娶于凌皆孺人主之有女孫三人其葬也在某原嗚呼憂患之來士大夫或喪其所守而孺人一女子極人生至不堪之境乃力持門戶拮据于覆巢毀室之餘養生

送死無憾此誠當世所難能宜鑒之石以待異日國史
之采擇者也



曝書亭集卷七十三